

宋
元
學
案

紫微學案表

呂本中

從子

大器

從孫

祖謙

別爲東萊學案

萊陽孫
元城龜山廬

從孫

祖儉

別見東萊學案

山了翁和靖從子

大倫

震澤門人
安定泰山陳從子

大猷

水百源二程
橫渠清敏焦從子

大同

氏再傳
廬陵謙溪鄭

林之奇

從子

子冲

呂祖謙

別爲東萊學案

劉世南

別見豫章學案

李楠

李樗

汪應辰

別爲玉山學案

王時敏

別見和靖學案

章憲

章哲

周憲

並見震澤學案

王師愈

別見龜山學案

曾季狸

方疇

方豐之

——子

士錄

別見滄洲諸儒學案

黃樵

三山學侶

曾幾

別見武夷學案

許忻

別爲范許諸留學案

並紫微講友



宋元學案卷三十六

餘姚黃宗義原本

後學慈谿馮雲濠校刊

男百家纂輯

鄞縣王梓材重校

鄞縣全祖望補定

道州何紹基重刊

紫微學案

祖望謹案大東萊先生爲榮陽冢嫡其不名一師亦家風也自元祐後諸名宿如元城龜山廬山了翁和靖以及王信伯之徒皆嘗從遊多識前言往行以畜其德而溺于禪則又家門之流弊乎述紫微學案

梓材案紫微與及門諸傳本在和靖卷中自謝

山始別爲學案

榮陽家學

胡程再傳

文清呂東萊先生本中

呂本中初名大中字居仁其先東萊人自文靖公始家京師父好問資政殿學士封東萊郡侯先生以正獻公恩補承務郎紹聖閒黨事起正獻追貶先生亦坐黜元符中復官政和五年調興仁濟陰簿繼爲泰州士曹丁母憂吉除大名路撫幹宣和六年除樞密院編修官靖康初遷職方員外郎以不答梁師成大著名紹興六年自直祕閣主管崇道觀召赴行在特賜進士出身擢起居舍人兼權中書舍人七年上幸建康先生奏曰當今之計必爲恢復事業求人才卹民隱審政刑開言路然後練兵謀帥增師上流固守淮甸伺彼有釁一舉可克若邦本未強恐生他患引疾乞祠直龍圖閣知台州不就主管太平觀召爲大

常少卿八年遷中書舍人又兼權直學士院初先生與秦檜同爲郎意歡甚秦又先生父所薦御史也趙忠簡鼎耳熟先生名亦大欽嚮之先生之眞拜西掖也趙秦適爲左右揆論議多不諧檜有專擅之意欲排不附己者先生爲陳同人于野亨之義檜不然之又力勸檜不可汲用親黨除目下先生卽奏還之檜勉其書行卒不從會哲宗實錄成忠簡除特進先生草制有曰會晉楚之成不若尊王而賤伯散牛李之黨未知明是以去非檜大怒言于上曰本中受鼎風旨伺和議不成爲脫身之計風御史蕭振劾罷與祠卒于上饒年六十二學者稱爲東萊先生賜諡文清所著有春秋解童蒙訓師友淵源錄行于世先生少從游定夫楊龜山尹和靖遊而于和靖尤久和靖之致仕也先

生問曰伊川歸田納其告敕曰臣本布衣得還初服爲榮今先生受四品服致仕與伊川異何也和靖曰居仁責我則是但燔荷聖恩四章不允復賜雜物今解孟子以進當俟書成隨納章服耳先後之間非有異也從孫祖謙祖儉修

祖望謹案先生歷從楊游尹之門而在尹氏爲最久故梨洲先生歸之尹氏學案愚以爲先生之家學在多識前言往行以畜德蓋自正獻以來所傳如此原明再傳而爲先生雖歷登楊游尹之門而所守者世傳也先生再傳而爲伯恭其所守者亦世傳也故中原文獻之傳獨歸呂氏其餘大儒弗及也故愚別爲先生立一學案以上紹原明下啟伯恭焉

梓材謹案先生主濟陰簿時榮陽門人顏夷仲贈詩有同升夫子堂句先生罷官留別亦云昔日同升夫子堂知先生固從學榮陽兼聞父祖之訓者第以爲榮陽家學可也

西垣童蒙訓

補

學問當以孝經論語中庸大學孟子爲本熟味詳究然後通求之詩書易春秋必有得也既自做得主張則諸子百家長處皆爲吾用

後生學問且須理會曲禮少儀儀禮等學灑埽應對進退之事及先理會爾雅訓詁等文字然後可以語上下學而上達自此脫然有得自然度越諸子也不如是則是躐等犯分陵節終不能成

本中往年每侍前輩先生長者論當世邪正善惡是是非非無

不精盡至于前輩行事得失文字工拙及漢唐先儒解釋經義
或有未至後生敢置議及之者必作色痛裁折之曰先儒得失
前輩是非豈後生所知蓋前輩專以風節爲己任其于褒貶取
予甚嚴故其所立實有過人者近年以來風節不立士大夫節
操一日不如一日

齊晏子納邑衛公孫免餘辭邑鄭子張歸邑此古人辭尊居卑
辭富居貧處亂世自全之道

國語公父文伯之母分別沃土瘠土之民以爲聖王勞其民而
用之左傳亦言民生在勤以此知勤勞者立身爲善之本不然
萬事不舉細民能勤勞者必無凍餒之患嫺情者必有饑寒之
憂然則後生處身居業可不以勤勞爲先乎

萬物皆備于我反身而誠富有之大業至誠無息日新之盛德也

范辨叔說今太學長實博士居此任者皆利于養資考求外進也爲之學士者皆利于歲月應舉也上下以利相聚其能長育人才乎此于本亦已錯更不須言也

立節非一朝一夕所能爲蓋在平日之所養也李自明云此事聞時說甚易在臨事要執得定嘉祐以前以言事被責爲榮一諫官以言被責時兼判國子監乃與諸生往賀焉旣見顏色慘沮殆不能語昔人尙如此

莊子曰道之眞以治身其緒餘土苴以治天下國家曰是不然禮記曰誠者非徒成已也將以成物獨善一身之道乃兼善天

下之道但行之有先後耳若以莊子爲我之說烏在其學聖人也

祖望謹案紫微所作切要于童蒙訓一書其所述諸大儒言行子已采入諸學案其未盡者列于此卷而官箴見于

成公集中者亦備引之

梓材謹案童蒙訓謝山列入于此者四十二條尙有可入諸學案者今移入安定學案一條移入高平學案四條移入廬陵學案一條移入濂溪學案一條移入明道學案一條移入伊川學案二條移入范呂諸儒十條移入元城學案一條又一條附入案語又移入景迂學案一條移入榮陽學案三條移入龜山學案一條附入呂范諸儒案語者一條又移入陳鄒諸儒三條移入荆公新學各一條又一條分列泰山學案高平學案榮陽學案陳鄒諸儒學案而仍列于此者九條

謝山跋宋槧呂西垣童蒙訓曰紫微先生師友雜誌雜說

諸書大略與童蒙訓三卷互相出入無甚異同也記晁公武讀書志曾引童蒙訓中語謂秦淮海自過嶺後詩嚴重高古自成一家與其舊作不同而今無之然則尙非足本邪然讀樓迂齋序則是本乃紫微從子倉部彌中所手鈔大愚子荷年所是正不應尙有脫落或者公武誤指紫微詩話以爲是書未可知也

中誤

雲濠案彌中爲紫微弟倉部乃彌中子大器其云從子倉部彌

舍人官箴

當官之法唯有三事曰清曰慎曰勤知此三者可以保祿位可以遠恥辱可以得上之知可以得下之援然世之仕者臨財當事不能自克常自以爲不必敗持不必敗之意則無所不爲矣

然事常至于敗而不能自己故設心處事戒之在初不可不察
借使役用權智百端補治幸而得免所損已多不若初不爲之
爲愈也司馬子微坐忘論云與其巧持于末孰若拙戒于初此
天下之要言當官處事之大法用力簡而見功多無如此言者
人能思之豈復有悔吝邪

事君如事親事官長如事兄與同僚如家人待羣吏如奴僕愛
百姓如妻子處官事如家事然後爲能盡吾之心如有毫末不
至皆吾心有所未盡也故事親孝故忠可移于君事兄弟故順
可移于長居家理故事可移于官豈有二理哉

當官處事常思有以及人如科率之行旣不能免便就其開求
其所以使民省力不使重爲民害其益多矣

不與人爭者常得多利退一步者常進百步取之廉者得之常過其初約于今者必有垂報于後不可不思也惟不能少自忍者必敗此實未知利害之分賢愚之別也

黃氏補

當官之法直道爲先其有未可一向直前或直前反敗大事者須用馮宜徽所稱惠穆稱停之說此非特小官然也爲天下國家當知之

當官者難事勿辭而深避嫌疑以至誠遇人而深避文法如此則可以免禍

黃氏補

前輩嘗言小人之性專務苟且明日有事今日得休且休當官者不可徇其私意忽而不治諺曰勞心不如勞力此實要言也當官既自廉潔又須關防小人如文字應引之類皆須明白以

防中傷不可不至謹不可不詳知也

徐丞相擇之嘗言前輩多盡心職事仁廟朝有爲京西轉運使者一日見監審官問曰所燒柴凡幾竈曰十八九竈曰吾所見者十一竈何也審官愕然蓋轉運使晨起望審中所出煙幾道知之其盡心如此

黃氏補

當官者詳讀公案則情僞自見

黃氏補

當官者凡異色人皆不宜與之相接巫祝尼嫗之類尤宜疏絕要以清心省事爲本

後生少年乍到官守多爲猾吏所餌不自省察所得毫末而一任之閒不復敢舉動大抵作官嗜利所得甚少而吏人所盜不貲矣以此被重譴良可惜也

當官者先以暴怒爲戒事有不可當詳處之必無不中若先暴怒只能自害豈能害人前輩嘗言凡事只怕待待者詳處之謂也蓋詳處之則思慮自出人不能中傷也嘗見前輩作州縣或獄官每一公事難決者必沈思靜慮一日忽然若有得者則是非判矣是道也唯不苟者能之

處事者不以聰明爲先而以盡心爲急不以集事爲急而以方便爲上

孫思邈嘗言憂于身者不拘于人畏于己者不制于彼慎于小者不懼于大戒于近者不侈于遠如此則人事畢矣實當官之要也

黃氏補

同僚之契交承之分有兄弟之義至其子孫亦世講之前輩事

以此爲務今人知之者蓋少矣又如舊舉將及舊嘗爲舊任按察官者後已官雖在上前輩皆辭避坐下坐風俗如此安得不厚乎

當官取傭錢般家錢之類多爲之程而過受其直所得至微而所喪多矣亦殊不如此數亦吾分外物也

當官者前輩多不敢就上位求薦章但盡心職事所以求知也心誠盡職求之雖不中不遠矣未有學養子而後嫁者也當官遇事以此爲心鮮不濟矣

黃氏補

畏避文法固是常情然世人自私者率以文法難事委之于人殊不知人之自私亦猶己之自私也以此處事其能有濟乎嘗謂仁人所處能變虎狼如人類如虎不入境不害物蝗不傷

稼之類是也如其不然則變人類如虎狼凡若此類及告訐中傷誦人欲置于死地是也

黃氏補

當官大要直不犯禍和不害義在人消詳斟酌之爾然求合于道理本非私心專爲己也

當官處事但務著實如塗擦文書追改日月重易押字萬一敗露得罪反重亦非所以養誠心事君不欺之道也百種姦偽不如一實反覆變詐不如慎始防人疑眾不如自慎智數周密不如省事不易之道

事有當死不死其誥有甚于死者後亦未必免死當去不去其禍有甚于去者後亦未必得安世人至此多惑亂失常皆不知義命輕重之分也此理非平居熟講臨事必不能自立古之欲

委質事人其父兄日夜先以此教之矣中材以下豈臨事一朝一夕所能至哉教人有素其心安焉所謂有所養也

忍之一字眾妙之門當官處事尤是先務若能清慎勤之外更行一忍何事不辦書曰必有忍其乃有濟此處事之本也諺有之曰忍事敵災星少陵詩云忍過事堪喜此皆切于事理爲世大法非空言也王沂公嘗說喫得三斗醋醋方做得宰相蓋言忍受得事也

梓材謹案謝山所錄官箴十八條今移入榮陽學案一條移入陳鄒諸儒一條又從黃氏補本錄入者十一條共一條移入高平學案一條移入范呂諸儒一條移入榮陽學案一條移入陳鄒諸儒

紫微說補

世之學者忘邇而趨遠忽卑而升高虛詞大言行不適實雖始

就學則先云言不必信行不必果達節行權由仁義行而不知言必信行必果守節共學行仁義之爲先務也故修其身者荒唐謬悠之說施于事者顛倒雜亂而卒無所正也

王輔嗣云安身莫若無競修己莫若自保守道則福至求祿則辱來實法言也

以上見文集

梓材謹案謝山節錄紫微童蒙訓外又錄其說三條云見文集蓋見成公集耳今移一條于元城學案

雜錄

少年無輕議人無輕議事

補

梓材謹案謝山所節王氏困學紀聞引呂居仁雜錄如是即謝山所謂與童蒙訓互相出入者也深寧謂二語本魏李秉象識

祖望謹案紫微之學本之家庭而徧叩游楊尹諸老之門

亦嘗及見元城多識前言往行以告德成公之先河實自此出顧世以其喜言詩也而遂欲以江西圖派揜之不知先生所造甚高成公詩云吾家紫微翁獨守固窮節金鑾朝罷歸朝飯而薇蕨戢戢李杜壇總角便高躋暮年自誓齋銘几深刻責名章與俊語埽去秋一葉冷淡靜工夫槁乾迂事業有來媚學子隨叩無不竭辭受去住閒告戒意尤切可以知先生晚年之養矣惟是其于釋氏之學有未盡斥者則滎陽之遺風也然學者讀其童蒙訓官箴而行之足以入聖學矣于其俟佛姑置之可也

附錄

自少講學卽聞父祖至論又與諸君子晨夕相接薰陶嘗言德

無常師主善爲師此論最要又謂學者當熟究孝經論語中庸大學然後徧求諸書必有得矣從游楊尹叩微旨復造劉安世陳瓘之門請益公之學問端緒深遠蓋如此

六飛幸吳郡欲進躡建康公論自古創業中興者必有根本之地以制四方之地必有根本之兵以制四方之兵今所仰以爲根本之地者不過兩浙江東福建而已然而諸路凋殘民力已困所仰以爲根本之兵者禁衛是也而單弱不可用乞令大臣廣選才略先求二者之要而力行之

苗互監階州倉草場以贓獲罪黥之公奏曰近歲官吏犯贓多抵黥罪且旣名士人行法之際宜有所避況四方之遠或有枉濫何由盡知若遽施此刑異時察其非辜雖欲深悔亦無及矣

又此刑既用臣恐後世不幸奸臣弄權必且借之以及無罪使國家此刑不絕則紹聖以來儉人盜柄搢紳遭此殆無遺類矣願酌處常罰以稱陛下仁厚之意疏再上從之

駕幸建康公疏言當今之計必先爲恢復事業乃可觀釁而動若但有其志而無其業恐益他患今江南二浙科須實繁閭里告病尤當戒謹儻有水旱乏絕之虞奸宄竊發未審何以待之復請于九江鄂渚荆南諸處多宿師旅臨以重臣至如孫氏以來名將皆言西陵建平國之蕃表今二處正在荆峽間當精擇守臣假之權柄以待緩急則江南自守之計差爲備矣

論任人當別邪正邇來建言用事之臣稍稍各徇私見不主正說元祐紹聖混爲一途其意皆有所在若不早察必害政體

公以切直忤柄臣一斥不得復用貧甚人多爲公戚而公方且
深居講明道學要其視摧抑屏棄爲士之常初不以介意也
公器蘊宏厚行誼純篤誠意充積表裏無間與人忠信樂易卽
之藹然莫見其喜愠平日學問以窮理盡性爲本卓然高遠不
可企及

王深寧困學紀聞曰趙襄子曰以能忍恥庶無害趙宗乎說苑
談叢曰能忍恥者安能忍辱者存呂居仁謂忍誦二字古之格
言學者可以詳思而致力補

紫微講友

文清曾茶山先生幾

別見武夷學案

吏部許先生忻

別爲范許諸儒學案

紫微家學

胡程三傳

倉部呂先生大器

奉議呂先生大倫

合傳

呂先生大猷

合傳

呂先生大同

合傳

呂大器字治先弼中子紫微從子累官尙書倉部郎東萊之父也兄弟四人曰大倫字時敘大猷字允升大同字逢吉築豹隱堂以講學汪文定公稱之嘗謂呂奉議時敘貧甚閒廢日久可憐而尤愛逢吉謂其所講釋者莫非前言往行之要蓋皆有得于家學者也治先爲曾文清公壻兼得其傳兄弟中惟逢吉大

梓材謹案汪玉山與逢吉書謝山節錄六條于玉山學案其五條今分移高平潑水元城景迂諸學案

紫微門人

提舉林三山先生之奇

林之奇字少穎一字拙齋侯官人從居仁遊教之以廣大爲心以踐履爲實稱高弟紹興丙辰西上應進士行至北津而返曰未忍舍吾親也益肆力于學及門嘗數百人學者稱爲三山先生成紹興己巳進士由長汀尉薦除正字遷校書郎入對言堯舜執中不離仁義次言宜革文弊歸于忠實次言無尙老莊之學高宗褒納之御製損齋記先生奏言損思以益德損用以益本損華以益實朝議欲兼用王氏新經先生言晉人以王何清談之罪深于桀紂胡蝗內食考其端倪王氏實負王何之責所謂邪說誠行淫辭之不可訓者先生嘗言欲圖中原必自巴蜀

若浮江絕淮下梁宋以圖中原必不能也故赤壁泥水雖一勝而卒不能長驅而前符離之捷中外稱賀先生獨貽書幕府戒以持重已而果覆以病乞去除宗正丞使泉舶奉祠尋卒三山之門當時極盛今其弟子多無可攷而呂成公其出藍者也先生所著有尙書周禮論孟楊子等講義又拙齋集二十卷今惟尙書與集存

修○雲懷案尙書全解宋志作五十八卷內府藏本爲四十卷

拙齋紀問

補

司馬牛問仁問君子兩次未達此非能領解者然亦可謂善問蓋世亦有一種不言不語的人豈可一槩謂之仁亦有一種愚戇直行之人豈可一槩謂之君子故孔子遂告以爲之難內省不疚

論語一部聖人之心體在是須是不釋手看始得

雖欲從之末由也已全體是自己更有什麼從无妄卦曰无妄之往何之矣无妄矣更有什麼往

易理無非自然三百八十四爻此是一年日數蓋連閏也

陳魯山云應二十八宿所直日遇月宿多作雨心月狐危月燕畢月烏張月鹿子因悟月離于畢俾滂沱矣之意

革巳日乃孚三三其卦兌上離下離爲日在兌下日已西矣故爲巳日之象

謝夫人謂安石曰何不教兒安石曰我常自教兒此語甚好然未必能行期喪不輟音樂攜妓遊東山此豈可以教兒

魏幾道云天乃錫子洪範九疇彝倫攸敘禹之所以能敘彝倫

者由其治水能順天地生數之順焉觀其冀州既載蓋始于北方乃始及兗青徐又次及荆揚乃及豫然後梁雍終焉蓋自北方而東自東而南乃及于中而終以西北其順如此所以爲敘彝倫

前輩云疑字悔字皆進學門戶學者須是疑是悔于道方有所入

學者到得臨利害處放倒做是他原不曾有立若實有所立如何放得倒

前輩所立規模不可輕變雖細事變之亦有其害

凡觀人之術無他但作事神氣足者不富貴卽壽考

喻居中云詩尙不愧于屋漏室西南隅謂之奧尊者所居也東

北隅謂之屋漏去尊者最遠人之常情去尊者遠則必有夷倨此不愧屋漏所以謂戒謹之至

易先甲三日後甲三日先庚三日後庚三日蓋十干除戊己不在四時循環之列惟以甲乙丙丁庚辛壬癸爲四時之序甲陽之始庚陰之始先甲後甲三日皆庚也先庚後庚三日皆甲也甲後乙丙丁爲庚庚後辛壬癸爲甲皆隔三日俗云久雨不晴儘看甲庚蓋此二日陰陽之始故必有變易

梓材謹案拙齋紀同亦稱道山記問謝山所錄十九條今移入和靖學案者二條移入武夷學案者二條移入漢上學案者一條移入衡麓學案者一條

鄉貢李和伯先生楠

李楠字和伯侯官人也與其弟樛並有名呂居仁入閩先生兄

弟與林少穎首事之遂得伊洛之傳少穎謂先生如元紫芝其弟如黃叔度其論學之言曰不用私稱輕重自定不用私斛多寡自足不用私心是非自明又曰夢者心之鑑人之善或以矜持矯飾爲之至夢寐間則毫髮不可掩君子以夢爲鑑自知心之誠僞又曰道有並行而不悖者人之善則譽之己不可以自譽人之過則恕之己不可以自恕人之貧則矜之己不可以自矜又曰吾于甫田得爲學之道于衡門得處世之方又曰陳平燕居深念陸賈至前而不見吾欲以是慎吾思嚴顏曰所頭便所頭何怒耶吾欲以是懲吾忿又曰春秋之不可以凡例拘猶易之不可泥于象數苟惟取必于例與柱後惠文何異哉先生尤精于春秋旁搜眾說以會其趣眾說所未安然後斷以己意

其書未成而卒年止三十有七論者惜之

修

鄉貢李迂齋先生檇

李檇字迂仲侯官人自號迂齋與兄楠俱有盛名並以鄉貢不第早卒臨終謂林少穎曰空走一遭勉齋嘗稱之曰吾鄉之士以文辭行義爲學者宗師若李若林其傑然者也所著有毛詩解博引諸說而以己意斷之學者亦稱爲三山先生

雲濠案閩書言先生

有毛詩註解學者稱迂齋先生

于少穎爲外兄林李出也

文定汪玉山先生應辰

別爲玉山學案

隱君王先生時敏

別見和靖學案

章復軒先生憲

章先生憲

周先生憲

並見震澤學案

說書王先生師愈

別見龜山學案

隱君曾艇齋先生季狸

曾季狸字裘父臨川人南豐先生弟宰之曾孫先生嘗遍從南渡初年諸名宿而學道以呂舍人居仁爲宗乾淳諸老多敬畏之嘗勉張宜公爲范堯夫而戒以勿輕言兵隱居蕭然布衣劉其父張于湖爭薦之謝不出其師友尺牘舍人居第一先生嘗一試禮部不中終身不赴有艇齋雜著一卷乃議論古今之文陳振孫稱其辭質而義正可以得其人蓋有所傳于伊洛之統者也

補

梓材謹案直齋書錄解題云羣之弟曰湘潭主簿宰宰之孫曰大理司直晦之季狸其子也少從呂居仁徐師川遊

是先生又爲徐氏門人

通守方困齋先生疇

方疇字耕道弋陽人也學者稱爲困齋先生受業于紫微而徧從胡文定父子張橫浦諸公遊紫微嘗述顧子敦語以告之曰守至正以待天命觀物變以養學術因名其所居之堂曰守正曰觀養且曰吾將朝于斯夕于斯以無忘呂公之賜建炎中成進士紹興中上書有四宜憂謂女眞詭計盜賊猖獗藩鎮跋扈將帥畏怯十宜行講征伐理財用擇人才明賞罰重臺諫抑奄寺議詔令卹凶荒訓鄉兵寬民力一宜去則宰相秦檜也通判武岡太守宋若樸希宰相意言先生與胡忠簡公爲姻家以深文貶零陵忠簡自嶺外貽之書曰君取易困卦詳玩而深索之

則得所以處困之道矣先生于是名其所居曰困齋其讀易也謂之困交其自稱曰困叟張魏公雅重之先生才氣抗邁閨門雍睦之行甚篤出處又不苟謫居好學不倦汪文定公嘗曰幸聞耕道之風庶取則不遠且足令吾同學者有所興起後赴判建康卒于官有集二十卷

補

監鎮方先生豐之

方豐之字德亨莆田人也從紫微呂公學于信州其後辭歸紫微以詩送之有云子學既立子志甚遠何以終之在不倦是也仕至監鎮先生後以婦家遂遷建陽工詩蓋亦紫微之餘風朱子與放翁皆嘗序之子士繇則朱子之門人孫丕父則勉齋之

門人
補

三山學侶

宣教黃先生標

黃樵字實夫

雲濠案先生名一作樵

漳州人樵仲之弟淳熙中舍選入對

大廷獻十論升進士丙科調南劍州教授三山講學之侶二李與林其眉目而先生亦翹楚也迂仲解毛詩先生足之兼傳龜山了齋之學官終宣教郎有詩解中庸語孟解

修

倉部家學

胡程四傳

成公呂東萊先生祖謙

別爲東萊學案

忠公呂大愚先生祖儉

別見東萊學案

林氏家學

主簿林先生子冲

林子冲字通卿拙齋猶子主南豐簿能世其學

補

林氏門人

成公呂東萊先生祖謙

別爲東萊學案

司理劉先生世南

別見豫章學案

方氏家學

方遠庵先生士繇

別見滄州諸儒學案

宋元學案卷三十六終

漢上學案表

朱震

劉長福

別見泰山學案

上蔡門人
二程再傳

徐畸

吳葵

別見說齋學案

安定濂溪三
傳

朱巽

胡銓

別見武夷學案

並漢上學侶

沈該

漢上同調

田疇

沈氏續傳

宋元學案卷三十七

鄞縣全祖望補本

後學慈谿馮雲濠校刊

鄞縣王梓材重校

道州何紹基重刊

漢上學案

祖望謹案上蔡之門漢上朱文定公最著三易象數之說
未嘗見于上蔡之口而漢上獨詳之尹和靖胡文定范元
長以洛學見用于中興漢上實連茹而出顧世之傳其學
者稍寡焉述漢上學案

梓材案漢上傳本在上蔡
學案自謝山爲別立學案

上蔡門人二程再傳

文定朱漢上先生震

朱震字子發荆門軍人登政和進士第累仕州縣胡文定安國
大器之薦召爲司勳員外郎趙忠簡鼎復薦其廉正守道士人
冠冕使備講讀必有裨益再召始至首問易春秋之旨上悅改
除祠部員外郎兼川陝荆襄都督府詳議官遷祕書少監侍經
筵轉起居郎兼建國公贊讀與翊善范元長沖人謂極天下之
選遷中書舍人兼翊善轉給事中累遷翰林學士太常吳表臣
議行明堂之祭先生言王制國有大喪三年不祭惟天地社稷
爲越綽而行事春秋譏吉禘于莊公謂不三年也國朝景德三
年合祀天地遂享太廟時眞宗未行三年之喪以日易月在今
日行之則非矣其言不用紹興七年謝病丐祠卒上慘然曰楊
時物故安國與震又亡朕痛惜之錄其子官先生經學深醇有

漢上易解云陳搏以先天圖傳種放種放傳穆修穆修傳李之才之才傳邵雍放以河圖洛書傳李溉李溉傳許堅許堅傳范諤昌諤昌傳劉牧修以太極圖傳周敦頤敦頤傳程顥程頤是時張載講學于程邵之閒故雍著皇極經世書牧陳天地五十有五之數敦頤作通書程頤述易傳載造太和參兩等篇臣今以易傳爲宗和會雍載之論上采漢魏吳晉下逮有唐及今包括異同庶幾道離而復合蓋其學以王弼盡去舊說雜以莊老專尙文辭爲非故其于象數加詳焉其論圖書授受源委亦如此蓋莫知其所自云

雲濠案四庫書目經部收錄漢上易集傳十一卷卦圖三卷叢說一卷

祖望謹案漢上謂周程張劉邵氏之學出于一師其說恐不可信其意主于和會諸家而反不免于晁氏所譏舛錯

者也然漢上之立身則粹然真儒也

漢上易卦圖說

列禦寇曰易者一也一變而爲七七變而爲九九復變而爲一
李泰伯曰伏羲觀河圖而畫卦禦寇所謂變者論此圖也一者
太極不動之數七者大衍數九者玄數也泰伯謂畫卦亦未盡
其實大衍五十之數寓于四十有五之中黃帝書土生數五成
數五太玄以五五爲土五卽十也

王洙曰山海經云伏羲氏得河圖夏后因之曰連山黃帝氏得
河圖商人因之曰歸藏列山氏得河圖周人因之曰周易斯乃
杜子春之所憑抑知姚信之言非口自出但所從傳者異耳梁
武攻之涉于率肆

以上河圖說

洛書劉牧傳之一與五合而爲六二與五合而爲七三與五合而爲八四與五合而爲九五與五合而爲十一六爲水二七爲火三八爲木四九爲金五十爲土十卽五五也洪範曰一五行太玄曰一與六共宗二與七共朋三與八成友四與九同道五與五相守范望曰重言五者十可知也一三五七九奇數合二十有五所謂天數二四六八十耦數合三十所謂地數故曰天地之數五十有五數五卽十也故河圖之數四十有五而五十之數具洛書之數五十有五而五十之數在焉惟十卽五也故甲己九乙庚八丙辛七丁壬六戊癸五而不數十十盈數也

洛書說

伏羲八卦圖王豫傳于邵康節而鄭吏得之歸藏初經者伏羲

初畫八卦因而重之者也其經初乾初夷坤初艮初兌初坎

初離初震震初巽卦皆六畫卽此八卦也八卦既重爻在其中

薛氏曰昔神農氏既重爲六十四卦而初經更本包犧八卦成
列而六十四具焉神農氏因之也繫辭曰神農氏作斲木爲耜
揉木爲耒耒耨之利以教天下蓋取諸益王輔嗣以爲伏羲重
卦鄭康成以爲神農重卦其說源于此子曰天地定位山澤通
氣雷風相薄水火不相射天地定位則乾與坤對山澤通氣則
艮與兌對雷風相薄則震與巽對水火不相射則坎與離對而
說卦健順動入陷麗止說馬牛龍雞豕雉狗羊首腹足股耳目
手口與夫別象次序皆初卦也史曰乾之初交于坤之初得震
故爲長男坤之初交于乾之初得巽故爲長女乾之二交于坤

之二得坎故爲中男坤之二交于乾之二得離故爲中女乾之上交于坤之上得艮故爲少男坤之上交于乾之上得兌故爲少女乾坤大父母也故能生八卦復姤小父母也故能生六十四卦復之初九交于姤之初六得一陽姤之初六交于復之初九得一陰復之二交于姤之二得二陽姤之二交于復之二得二陰復之三交于姤之三得四陽姤之三交于復之三得四陰復之四交于姤之四得八陽姤之四交于復之四得八陰復之五交于姤之五得十六陽姤之五交于復之五得十六陰復之上交于姤之上得三十二陽姤之上交于復之上得三十二陰陰陽男女皆順行所以生六十四卦也

伏羲八卦圖說

乾坤天地之本坎離天地之用乾坤交而爲泰坎離交而爲既

濟乾生于子坤生于午坎終于寅離終于申

連山也

以應天時也

置乾于西北

伏羲初經乾上坤下故曰天尊地卑乾坤定矣

退坤于西南

歸藏以坤先乾乾統

三男而長子用事坤統三女而長女代母坎離得位而兌貝爲

耦

復歸于伏義之初經

以應地之方也王者之法盡于是矣故易始于乾

坤終于坎離既濟未濟而泰否爲上經之中咸恆爲下經之首

乾坤本也坎離用也乾坤坎離上篇之用也咸兌貝也恆震巽

也兌貝震巽下篇之用也頤大過小過中孚二篇之正也故曰

至哉文王之作易也其得天地之用乎

李挺之變卦反對圖說

往來者以內外言也以消息言也自內而之外謂之往自外而

之內謂之來請復借賁卦言之柔來而文剛者坤之柔自外卦

下而來文乎乾之剛也分剛上而文柔者乾之剛自內卦上而

往文乎坤之柔也于柔言來則知分剛上而文柔者往也于剛
言上則知柔來而文剛者下也上者出也下者入也此所謂其
出入以度內外此所謂上下無常也若言柔來者明此本乾也
則不當言分剛上而文柔當曰剛來而文柔矣无妄之象曰剛
自外來而爲主于內外卦乾已三畫矣謂之自外來則當自卦
外來乎 六十四卦相生圖說

律應之元始于冬至卦氣起于中孚其書本于夏后氏之連山
而連山則首艮所以首艮者八風始于不周實居西北之方七
宿之次是爲東壁營室東壁辟生氣而東之營室者營陽氣而
產之于辰爲亥于律爲應鍾于時爲立冬此顓頊之應所以首
十月也 太玄準易圖說

夫六十卦乾貞于子而左行坤貞于未而右行屯貞于丑開時而左行蒙貞于寅開時而右行泰貞于寅而左行否貞于申而右行小過貞于未而右行七卦錯行律實效之黃鍾乾初九也大呂坤六四也太簇乾九二也應鍾坤六五也無射乾上九也夾鍾坤六三也夷則乾九五也仲呂坤六二也蕤賓乾九四也林鍾坤初六也初應四二應五三應上故子丑寅亥卯戌辰酉巳申午未謂之合聲

十二律相生圖說

夫坤之初六五月之氣姤卦也是時豈惟無冰而露亦未凝何以言履霜堅冰至曰一陰之生始凝于下驗之于物井中之泉已寒矣積而不已至于坤之上六則露結爲霜水寒成冰是以君子觀其所履之微陰而知冰霜之漸

坤初六圖說

乾坤鬼神也坎離日月水火也艮兌山澤也震巽風雷也坎離震兌四時也坎離天地之中也聖人得天地之中則能與天地日月四時鬼神合先天而天弗違聖人卽天地也後天而奉天時天地卽聖人也聖人與天地爲一是以作而萬物覩同聲相應震巽是也同氣相求艮兌是也水流湮火就燥坎離是也雲從龍風從虎有生有形各從其類自然而已

坎離天地之中圖說

夫陽生于子陰生于午自午至子七而必復乾坤消息之理也故以一日言之自午時至夜半復得子時以一年言之自五月至十一月以一紀言之自午歲凡七歲復得子歲天道運行其數自爾合之爲一紀分之爲一歲一月一日莫不皆然故六十卦當三百六十日而兩卦相去皆以七日且卦有以爻爲歲者

有以爻爲月者有以爻爲日者以復言七日來復者明卦氣也
陸希聲謂聖人言七日來復爲應數之微明是也

復七日來復

圖說

自初數之至上爲六或以一爻爲一歲一年同人三歲不興坎
三歲不得凶豐三歲不覲既濟三年克之未濟三年有賞于大
國或以一爻爲一月臨至于八月有凶或以一爻爲一日復七
日來復或以一爻爲一人需不速之客三人來損三人行則損
一人一人行則得其友或以一爻爲一物訟盤帶三襪晉晝日
三接師王三錫命比王用三驅睽載鬼一車田獲三狐損二簋
可用享萃一握爲笑革言三就旅一矢亡異田獲三品

爻數說

漢上易叢說

歸藏之乾有乾大赤乾爲天爲君爲父又爲辟爲卿爲馬爲禾
又爲血卦

歸藏小畜曰其丈人乃知丈人之言三代有之

莧陸澤草也生于三月四月莧實也葉柔根堅而赤陸大于莧
葉柔根堅堅者兌之剛也堅而赤赤者乾之色也

易有以一策當一日者乾坤之策是也有以一爻當一日者七
日來復是也有以策數七八九六言日者勿逐七日得是也易
之取象豈一端而盡六十卦直日兩卦相去皆七日其實則六
日七分猶書稱期三百有六旬有六日其實三百六十五日四
分日之一禮言三年之喪其實二十七月詩言一之日二之日
其實十一月十二月之日何于此六日七分而疑之乎

結繩而爲網罟以佃以漁則已取重離之象何則離麗也離爲目巽爲繩以巽變離結繩而爲網罟之象也網罟目也離爲雉巽爲魚以佃以漁之象也

彖者孔子贊易十篇之一先儒附其辭于卦辭之下故加彖以明之諤昌以乾彖釋元亨利貞文言又從而釋之疑其重複謂非孔子之言且引穆姜之言證之此又不然文言者文其言也猶序彖說卦之類古有是言或文王或周公之辭孔子因其言而文之以垂後世傳曰言之不文行之不遠故以文言名其篇如曰君子以非禮勿履則孔子所繫之大象也何以明之且以復卦大象言之曰雷在地中復先王以至日閉關商旅不行后不省方考之夏小正十一月萬物不通則至日閉關后不省方

夏之制也周制以十一月北巡狩至于北嶽矣以是知繫大象之辭非周公作也

說卦脫誤比于諸篇特多荀氏易本乾後有四象坤後有八震後有三巽後有二坎後有八而又以揉爲撓離後有一艮後有三兌後有二虞氏易本以龍爲號反爲阪塹爲專寡爲宜科爲折羊爲羔鄭本以廣爲黃乾爲幹黔爲黠京氏本以鼻爲末羸爲蠃果蓏爲果墜其餘陸績王肅姚信王虞偏傍點畫亦或不同蓋焚書之後周易雖存至漢已失說卦三篇後河內女子得而上之故三篇之文各有差誤

聖人死曰神賢人死曰鬼眾人死曰物聖人清明在躬志氣如神故五帝配上帝傳說上比列星賢人得其所歸眾人則知富

貴生而已其思慮不出于口腹之間在席之上夸張于世以自利焉物欲蔽之不能自反其初故謂之物然物之乘閒而出豈離乎五行哉

陰陽用也剛柔體也用之謂道體之謂德體用無閒和會爲一順而行之則動靜語默皆得其宜故曰和順道德而理于義天地萬物共由一理其理順而不妄深明其源乃能一天人合內外體用無閒矣此之謂盡性盡性則通晝夜之道而知其于窮達壽夭以正受之不資其心矣

蘇氏解需光亨曰光者物之神也此關子明之說也或問神曰日月在上其明在地夫日月之形其大如盤蓋光之所燭被乎萬物非神乎蓋神難言也故以光形容之君子動而有光廣大

无所不及故易言未光未光大者皆狹且陋也

附錄

先生初爲胡文定所薦稱疾不至會趙忠簡公鼎爲參知政事
高宗諮以當世人才趙曰臣所聞朱震學術深博乃召用是時
虔州民爲盜先生曰使居官者廉而不擾則百姓自安願詔選
良太守慰撫之且使到官之日條具官吏有貪墨無狀者一切
罷去聽其自擇慈祥仁惠之人使之

林拙齋紀問曰漢上叢說云反觀吾身乾坤安在哉善端初起
者乾也身行之而作成其事者坤也人皆有善端不亦易知乎
行其所知不亦簡能乎饑而食渴而飲晝作而夜息豈不簡且
易哉以此推之天下未有不知而作者也

魏鶴山師友雅言曰朱漢上云古者衣裳相連乾坤相依君臣上下同體也至秦始取衣裳離之今瀘敘獠俗多衣統袞猶是古法

漢上學侶

朱先生巽

朱巽字子權文定弟亦富學號二朱

參姓譜

梓材謹案姓譜原作字公權文定名震字子發先生名巽當字子權上蔡監西京竹木場文定與之往調事見上蔡附錄則亦上蔡弟子也

忠簡胡澹庵先生銓

別見武夷學案

漢上同調

僕射沈先生該

沈該字守約吳興人登嘉王楊進士紹興二十六年以右僕射兼修國史嘗撰易小傳其說以左氏卦變爲文嘗進之高宗降詔褒獎

參朱氏經義考

漢上門人

二程三傳

宣敎劉先生長福

別見泰山學案

隱君徐天民先生疇

徐疇字南夫一字叔範蘭溪人也漢上先生弟子得其周易旨要兼明春秋禮記湛深經術文得歐曾筆外法而弓兩斛力射命中隱居講學人莫知者東陽吳文炳獨知之延以敎其子于時婺中之以師道興起後進者曰東萊曰同甫曰說齋曰先生學者稱爲天民先生其所著有周易解微三卷

徐氏門人

二程四傳

主簿吳先生葵

別見說齋學案

沈氏續傳

田興齋先生疇

田疇號興齋華亭人嘉定閒嘗設講席于國學六館之士皆北面焉著有學易蹊徑二十卷

參姓譜

謝山田氏學易蹊徑題辭曰宋人之言互體者黎洲祇舉漢上黃中二家今觀興齋之說又有出于二家之外其每卦一圖皆以正卦兼變卦而言而並取其正變之互嘗攷其所自出則吳興沈氏也沈氏謂睽三則下互爲離其變則上互爲兌卽興齋之說也夫正卦之互在聖人取象或

有時而用之若變卦之互非取象所及也一卦自有一卦之象不容兼正變而互之也或曰左氏陳敬仲筮詞風爲天子土上山也杜元凱謂此觀之否正卦之三四五爻爲艮變卦之二三四爻亦爲艮故曰山則固合正變之互言之矣興齋之所本者此耳予曰此筮法也筮法合正與變而占之則亦得兼正與變之互而象之當聖人作象辭但發揮是爻之象而已安得預計其變而求合之將不勝其緒之紛矣易雖爲卜筮而作然要自有節次也沈氏不過偶一及之其說尙未及成興齋則每卦列焉竟欲以之定互體之說竊以爲未安若其餘甚有佳者嘉定以後經師如此不易得也

宋元學案卷三十七終